

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj : 32 0 St 486303 25 St
Tuzla, 30.07.2025. godine

Općinski sud u Tuzli, stečajni sudija Vedran Milašinović, u postupku predhodnog ispitivanja prijedloga za otvaranje stečajnog postupka nad dužnikom „INTRAL BH“ d.o.o. za proizvodnju, posredništvo i trgovinu obućom Tuzla, ul. XVIII Hrvatske brigade broj 2, sa podružnicom „INTRAL BH“ d.o.o. za proizvodnju, posredništvo i trgovinu obućom Tuzla – podružnica broj 1 – Maloprodaja Tuzla, ul. XVIII Hrvatske brigade broj 2 dana 30.07.2025. godine donio je slijedeće,

RJEŠENJE

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva „INTRAL BH“ d.o.o. za proizvodnju, posredništvo i trgovinu obućom Tuzla, ul. XVIII Hrvatske brigade broj 2, sa podružnicom „INTRAL BH“ d.o.o. za proizvodnju, posredništvo i trgovinu obućom Tuzla – podružnica broj 1 – Maloprodaja Tuzla, ul. XVIII Hrvatske brigade broj 2.

Za privremenog stečajnog upravnika imenuje Eldar Moćić iz Gradačca, Čelikovača 44.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- obezbijediti imovinu dužnika i starati se o istoj,
- ima ovlaštenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i
- uraditi kontrolu poslovanja stečajnog dužnika.
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u prethodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama F BiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Tuzli i Službi za geodetske i imovinsko-pravne poslove Grada Tuzla, radi upisa zabilježbe otvaranja prethodnog postupka.

Obrazloženje

„INTRAL BH“ d.o.o. za proizvodnju, posredništvo i trgovinu obućom Tuzla, ul. XVIII Hrvatske brigade broj 2, sa podružnicom „INTRAL BH“ d.o.o. za proizvodnju, posredništvo i trgovinu obućom Tuzla – podružnica broj 1 – Maloprodaja Tuzla, ul. XVIII Hrvatske brigade broj 2, kao dužnik podnio je dana 29.04.2025. godine ovom sudu prijedlog za otvaranje stečajnog postupka nad ovim privrednim društvom, zbog platežne nesposobnosti stečajnog dužnika.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1. i 2. Zakona o stečaju („Sl. novine F BiH“, br.53/2021. u daljem tekstu Zakon o stečaju) i da je isti dopušten, dana 03.06.2025. godine, naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka.

Predlagač je dana 19.06.2025. godine dostavio sudu dokaz o uplati predujmljenih sredstava za finansiranje prethodnog postupka u iznosu od 4.000,00 KM.

Na osnovu priložene dokumentacije i to; aktuelni izvod iz sudskog registra od 03.04.2025. godine, uvjerenje UIO BH od 15.04.2025. godine, uvjerenje PU F BiH od 18.04.2025. godine, odluka o prestanku rada društva od 31.03.2025. godine, JIB društva Intral BH od 18.04.2025. godine, posebni podaci o plaćama i broju zaposlenih uz godišnji obračun od 01.01.-31.03.2025. godine, obračun članarine od 01.01.-31.03.2025. godine, obračun naknade za korištenje, zaštitu i unapređenje šuma za period od 01.01.-31.03.2025. godine, izvještaj o obračunatim i uplaćenom posebnom porezu za zaštitu od prirodnih i drugih nesreća za period od 01.01.-31.03.2025. godine, izvještaj o obračunatim i uplaćenim vodnim naknadama za period od 01.01.-31.03.2025. godine, obavijest o razvrstavanju od 15.04.2025. godine, izjava o primjenjenom standardu finansijskog izvještaja od 15.04.2025. godine, odluka o utvrđivanju finansijskog izvještaja za period 01.01.-31.03.2025. godine, godišnje izvješće o poslovanju za razdoblje 01.01.-31.03.2025. godine, odluka o prijedlogu za pokriće gubitka za razdoblje od 01.01.-31.03.2025. godine, bilješke uz finansijske izvještaje za razdoblje 01.01.-31.03.2025. godine, aneks-dodatni računovodstveni izvještaj za privredna društva od 01.01.-31.03.2025. godine, godišnji izvještaj o investicijama za 2025. godine, izvještaj o ukupnom rezultatu za period –bilans uspjeha za period 01.01.-31.03.2025. godine, bilans stanja na dan 31.03.2025. godine, izvod o otvorenim računima za društvo od FIA i uplate predujma od 4.000,00 KM, predlagač je učinio vjerovatnim platežnu nesposobnost.

Na ročištu za saslušanje stečajnog dužnika održanog dana 26.05.2025. godine, zastupnik izjavi da je društvo prestalo sa obavljanjem djelatnosti otprilike u vrijeme kada su i blokirani računi društva, u martu 2021. godine, a u to vrijeme je i većina radnika društva objavljenja osim porodilja koje su bile na bolovanju. Naime, teškoće u poslovanju su nastale u periodu pandemije Corona virusa, što je naročito pogodilo preduzeća koja su se bavila obućarstvom. Prema Raiffeisen banci su izmirene obaveze u cijelosti unovčenjem nekretnine na kojoj je banka imala hipoteku i tom prilikom su izmirene obaveze i prema PU F BiH, dok je ostala obaveza prema BBI banci a koja je od sredstava obezbjeđenja imala samo mjenice ali ne i hipoteke niti zaloge. Radnicima je uvezan radni staž u cijelosti, a ostalo je neizmirenih obaveza na ime plaća u periodu septembar 2020. do februar-mart 2021. godine u ukupnom iznosu cca 80.000,00 KM, s tim da napominjem da su za radnike doprinosi uplaćeni odnosno uvezan

radni staž i za one mjesece za koje nije isplaćena plata. U pogledu imovine ističe da društvo u vlasništvu ima cca 180 mašina na kojima nisu zasnovane zaloge. Mašine se nalaze u skladištu društva Oxint u Živinicama u nekretnini koja je prethodno bila vlasništvo Konjuh dd Živinice, a navedeno društvo je mašine držalo bez obaveza za dužnika na ime skladištenja. Po procjeni zastupnika otprilike pola mašina je neupotrebljivo i moglo bi se unovčiti kao staro željezo a preostala polovina bi se mogla prodati pri čemu vrijednost nekih mašina iznosi nekoliko stotina a nekih i nekoliko hiljada KM u zavisnosti od stanja istih. Takođe napominje da društvo ima potraživanja prema Zavodu zdravstvenog osiguranja na ime refundacija bolovanja za porodilje, a društvo nije podnosilo zahtjeve za ove refundacije. Što se tiče obaveza prema dobavljačima u pretežnom dijelu su iste izmirene, te su ostala dva-tri dobavljača sa obavezama prema istima od po nekoliko hiljada KM (Adv. kanc. Hogić iz Tuzle, Račun. servis Necolcunting i BBI banka Sarajevo u većem iznosu, a ukoliko eventualno bilo i obaveza prema trećim licima ne radi se o znatnijim iznosima-do 1.000,00 KM).

Iz svega navedenog proizilazi da društvo nije u mogućnosti izvršavati svoje dospjele obaveza od momenta dospijeca u neprekidnom trajanju dužem od 60 dana od dana nastanka obaveze. Konačno stanje u pogledu eventualno drugih obaveza bi se moglo utvrditi u slučaju određivanja privremenog stečajnog upravnika koji bi sudu dostavio izvještaj o poslovnom stanju kod predlagača sa izjašnjenjem o uslovima za otvaranje stečaja.

Na osnovu podnesene dokumentacije i zakonskog zastupnika stečajnog dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju.

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

Stečajni sudija
Vedran Milašinović

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od dana objavljivanja. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.